



Universitätsbibliothek Paderborn

De Phiala Reliqviarvm S. Agathae Virginis Et Martyris Dissertatio

Wiltheim, Alexandre

Augustae Trevirorum, 1656

Capvt I. Phiala reliquiarum S. Agathae è lipsanotheca Machariacensi,
donum viri venerabilis Caroli Rachtij, pastoris Machariacensis, probante
cultum reliquiarum publicum Episcopo Azotensi, Eam videri ...

urn:nbn:de:hbz:466:1-10156

DE PHIALA RELIQVIARVM
S. AGATHÆ VIRGINIS
ET MARTYRIS
DISSERTATIO.

CAPVT I.

*Phiala reliquiarum S. Agathæ è lipsanothecâ Machariacensi, donum
viri venerabilis Caroli Rachtij, pastoris Machariacensis, probante
cultum reliquiarum publicum Episcopo Azotensi. Eam videri esse
lenticulam. De lenticulis disputatum. Tentatus locus Isidori.*

MACHARIACVM vetus est oppidum prouinciæ Luciliburgensis ad Mosellam supra Treuiros, tertio lapide à Luciliburgo nostro, in laeo littore situm. Nunc Greuemacheram, seu Comitis Macheram appellamus, eo quod comites nostri Luciliburgenses, locum muris & turribus circumplexi credantur. Certè exstant Henrici Comitis, cognomento Blondelli, tabulæ, quibus anno MCCLII. Machariacenses liberos & Burgenses esse iubet. Hâc reuertebar VI. Kalendas Iulias anni MDCLV. postquam férijs D. Ioannis Baptistæ sacrosancta & incomparabilia Treuirorum lipsana spectâsem & coluisse. Bene mane, ut mos itinerum nostrorum habet, in templo pætrœcia sacrificavi. Secundùm sacrificium animaduerti in sacrario lipsanothecam formâ & magnitudine orbis mensarij. Media erat Christi patientis imago: circum dispositi in orbem puluilli, in quibus, ut & eorum interuallis, reliquæ partim sub membraneis schedis aderant, partim desiderabantur, titulis tamen omnibus remanentibus. In uno puluillorum interuallo phiala perexigua, cum titulo nominis S. Agathæ Virginis, affixa erat. Quam ut vidi, deperij. Sed ut nostra esset iure quo optimo, postea à Venerabili viro Carolo Rachtio, Machariaci pastore, eam mihi dari rogaui, & impetraui, testibus hisce litteris, manu eius subscriptis.

*Carolus Racht, pastor in Comitum Machrâ, omnibus has visuris
salutem in Domino.*

CVm R. Pater Alexander Viltheim Societatis IESV Sacerdos & pro tempore Minister Collegij Luxemburgensis, petinerit à me reliquias S. Agathæ Virginis, in exigua phialâ vitreâ, uno fere dígito longâ, contentas; insuperque rogauerit, ut super dictis reliquijs ei testimoniales darem, non potui honestâ eius petitioni non as-
A 3 sentiri.

DE PHIALA RELIQVIARVM

*Sentiri. Itaque hīscē notum facio, me dīctas reliquias S. Agathā dīcto Patri Alexandro
VViltheim donāsse & donare: ipsas autem reliquias defūmptas esse ex antiquo quo-
dam reliquiario templi mei parochialis, quod præclaras diue sōrum sanctorum reli-
quias continebat. In quorum omnium fidem has manu mē signatas scripsi. Datum
in Comitum Machra XXV. Augusti MDCLV.*

Carolus Racht Pastor in Grāuenmacheren.

*His ip̄is Rachtij tabulis, Reuerendissimus Episcopus Azotensis approba-
tionem reliquarum hāc formulā cum suo nomine inscripsit.*

*Ut reliquiae S. Agathā in hīscē nominatae, publicē exponantur, & venerentur,
facultatem in Domino concedimus. Treuiris XXVIII. Augusti, anno MDCLV.*

*Frater Otho, Episcopus Azotensis, in Pontificalibus & spiritualibus
Vicarius generalis Trenirensis.*

*Hāc est reliquiarum prima præcipuaque auctoritas; cui etsi nihil addere
necessē est, magnum tamen illustrationi locum aperiunt tum ip̄sē reliquiae,
tum phiala, quā continentur. Et phiala quidem materia est vitrum rude ac
spissum: color albicans; nisi quod vbi densior materies, leniter flauescit.
Obturamentum membranula est in glomum indigestum contorta; quā ex-
plicata, tenuissima apparet, adeo ut cum delicatissimā quāque carbaſo de subti-
litate contendere posse videatur. Quā me res primō deterruit, ne membra-
nam crederem: sed ignis experimēto redditus nidor, fidem fecit.*

*Iam forma vasculi, quia figuraione, quam oratione, melius ostendi potest,
depindi eam atque in æs incidi curauimus.*

*Orificium vides rotundum & labello introrsum repando coronatum. Col-
lum ex gracilitate sensim in latum procurrente ventre tenuis, qui tamen mini-
mè ampulloſus, sed prærasus, nec pennā anserinā crassior, vt lateris aspectus
demonstrat. Nomen phialæ, opinor esse lenticulam. Est autem lenticula vas
paruum & exile, vt vocis ip̄sa diminutio ostendit. Vnde Ifidorus capite VII.
vigesimi Originum, prout est in veteri codice Griali, & nostro perantiquo,
manu exarato, lenticulam describit vasculum, & in libris editis, modicum vas,
qualis est phiala nostra; cui & lenti forma conuenit. Ut enim illa globosa
ferē non est, sed plana, seu, vt Plinius locutus est libro XVII. capite XII. suāfigurā, hoc est, cōpressa & complanata: ita & phialæ nostræ venter non turget,
sed in planum retrocedit. A lente autem legumine promanasse in talia vascu-
la nomen, argumento est Plinij locus de lente: *Duo genera eius in Ægypto,*
inquit, alterum rotundius, alterum suā figurā. Vnde vario usū translatum est in
lenticulas nomen, id est (vt ego quidem interpretor) vascula æque globosa at-
que*

que orbiculatim plana, *lenticula*, ex formâ variâ leguminis, appellatæ sunt. Lenticulam delicate, ut solet, depingit Apuleius II. Floridorum : *ampullam oleariam*, quam gestabat, *lenticulari formâ*, tereti ambitu, pressulâ rotunditate. Tereti ambitu, dixit, ob circularem ambitum : *pressulâ rotunditate*, ob ventris compressum & planicie domitum tumorem, quod postremum phiala nostra graphicè repræsentat, et si oblongior, & à tereti seu circulari ambitu non nihil recedens. Sed leue hoc est, & ex libitu vitriarij natum. Nec mirum videri id debet, cum Isidorus lenticulæ vasculum describat *quadrangulum*. Ita enim habent vulgati codices : *lenticula modicum vas, aneum vel argenteum, quadrangulum, in latere apertum*. Quanquam vereor ne mendosus sit hic locus. Tam enim à lentibus absunt anguli, ut in proverbio inanis insumptæ operæ haberentur olim illa verba φάκες γυνίας πατέρες : *lentem angulo tenes*. Quare vocem *quadrangulum* ex Isidoro, ut spuriam & immisiam, reuellendam putem; quin & ea, quæ adduntur, *in latere apertum*, vix est, ut pro genuinis patiar. Quid enim? An ideo *in latere apertum*, ut liquor per latus inutilis effugiat? Nisi ita accipis, ut *apertum* dictum sit pro eo, quod est planum dilatatu, & æqualiter patens. Sic *apertos campus*, & *aperta maria*, quæ planitiem & æquor haberent, Latini dixerunt. Quare, *in latere apertum*, pro eo positum forsan erit, quod diceres, latus vnum lenticulae, imò alternum vtrumque & sibi oppositum, esse *apertum*, hoc est, explanatum, æquabile. Vides itaque phialam nostram et si oblongam, recte lenticulam dici posse. Neque obest quod lenticulam *fictilem* D. Hieronymus, *aream aut argenteam* Isidorus esse volunt, nostra vero vitrea est. Nam si ex fide Hieronymi *fictiles* tantum est omnis lenticula, quid de *area* Isidori & *argentea* facies? Si, ut Isidoro placet, *area vel argentea* tantum, ergo *fictiles* nullæ Hieronymi. Sed absurdum est aut Hieronymum præ Isidoro sequi, ut *fictiles* tantum sint lenticulae, aut hunc præ illo, ut *area vel argentea* tantum. Est ergo locus alijs materijs, & ut ex vitro quoque conflatas fuisse lenticulas existimemus, qualis nostra.

C A P V T II.

Lenticula olearia, aquaria; phiale lacrymatoria Romanorum tam gentilium, quam Christianorum; ex quo genere videtur esse phiala nostra lenticularis; nisi est phiala antiqua sacramentalis.

VEnio nunc ad lenticularum usum. Oleo capiendo adhibitas à veteribus, multæ docent auctoritates. Primus liber Regum capite X. & quartus cap. IX. Apuleius, Floridis, ut supra ostensum. D. Hieronym. com-

men-